

Donostian, Gipuzkoako Diputazioaren jauregian, bildu dira: Dassance, Diharce, Irigoyen, Lafitte, Larzabal, Lojendio, Mitxelena eta Satrustegi euskaltzaiñak; Artetxe, Berriotxo, Etxaniz, J. M. Lekuona, Loidi, Aita Zabala, Zubikarai eta Zugasti urgazleak. Ezin etorria azaldu dute Arrue, Irigaray eta Villasante euskaltzaiñak.

Apirilleko batzar-agiria onartua izan da aurrenik.

Bertsolari-sariketa dala-ta, Gipuzkoako zenbait erritatik artu diran erantzunak irakurri ditu zadorlariak. Gero Aita Zabala'k, batzordekoen izenean, Andoain'en egu berria dan saioaz eta datorren igandean, illaren 28-an Mondragoe'n egingo danaz mintzatu da. Nafarroa-Bizkaietako saioak ere aipatu ditu Irigoyen'ek.

Gaiñera Aita Zabala'k Amezketan, Abuztuaren asieran, Fernando Amezketarriari egin nai dioten omenaldiaren berri eman du.

Eskea bidali du Arrue'k Euskaltzaindiak eskerrak eta zorionak eman dizazkion Zubikarai urgazleari Ondarroa'n, Domingo Agirre'ren gorazarretan, egin dituzten jai ederrakatik. Ao batez onartu da eskea.

Lekeitio'ko alkatearen gutuna irakurri da. Azkue'ren omenez prestatzen ari diran jaiak berriz ere aipatuaz, burubide-eske dator Euskaltzaindiagana sariketa eta euskal-ikastaldietarako. Erantzun bekio ahal dan laguntza eta babesa emanaz.

Vitoria'tik Odon da Apraiz urgazleak idatzi du Euskaltzaindiak eragin dizaion iri artako euskaltzaleek euskal-ikastaldiak sortzeko duten asmoari, leen izan baitira olakoak 1917 ezkerro. Biderik zuzenea Araba'ko Ahorro-Kaxagana jotzea dan ezkerro, egin bekio eskea zuzendariari.

Bizkaï'ko Diputazioak Euskaltzaindiaren iritzia eskatu du M.<sup>a</sup> Jesus Abasolo irakasleak euskeraz ba ote dakien erabaki dezan Gernika-Lumo'ko baserri-eskola batean irakasteko adina. Bilbao'n egin bedi orretarako azterketa.

Eztabaida sortu da bi puntutan. Jakin nai litzake, aurrenik, ea zenbateraiñoko babesa eman dezakean Euskaltzaindiak euskal-eskola eta ikastaldietarako. Zadorlariak dio eztagoela, dirudienez, lege jakiñik orretarako eta Euskaltzaindiak, legearen aurrean eskubiderik ez tuen ezkerro, ezin dezakeala baimenik eman, itzala eta laguntza baizik, eskatu zaion aldi oro egin duen bezala. Gero, komeni litzake, zenbaitek dienez, Euskaltzaindiak gaitasun-agiriak ematea, era jakin batean. Orretarako, Anaia Berriotxoak eta zadorlariak presta bezate egin ditezkean azterketen era ta tajua.

Donostia'ko "Agora"-k eratu duen aurtengo euskal-eleberri sariketarako deia etorri da. Maiekoak batzarrean autatzeko astirik etzegoen ezkerro zadorlariak erantzun du igazkoak berak izendatuaz, San Martin izan ezik, ezin dezakeala adierazi

baitu onek. Onako oek izan bitez, bada: Arrue, Irigaray, Loidi, Lojendio, Mitxelena. Igandean, illaren 28-an, izango da erabakia.

“Fundación Juan March”-i egin zaion galderaren erantzuna au izan da: “Vascongadas”-saria erabakitzea datorren udazkenerako geldituko dala noski.

Villafranca’ko “Ordizia-Esperanto-Grupo”-k Euskaltzainburuari leku bat eskeiñi dio datorren igandean an izango dan esperantista-batzarreko ohorezko batzordean. Baiezkoan erantzun bekie, eskerrak emanaz.

Araba’ko urgazleak aipatu diran ezkerro, X. Diharze’k gogora dakar an dagoela orain, Estibariz’en, euskaltzale trebe eta jakituna dan Aita Isidro Basterrika. Urgazle berrien autuera Abuztuan egin bear dan ezkerro, kontuan ar bedi orduan beronen izena.

Aurtengo “Lizardi” poesi-sarirako 16 olerki agertu dira. Epai maierako autuak izan dira Fernando Artola, Aresti, J. M. Lekuona, Aita Onaindia eta Zubikarai.

Loiola’ko Aguztuko batzarrerako ezta lanik jaso, dio Irigoyen’ek, baiña bestetan ere, eztitu iñork bidali aldez-aurretik, batzarrera eraman baizik. Aita Zabala’k dio Aita Goikoetxea’rekin bear dugula mintzatu prestaretarako.

Araudiaz, zadorlariak adierazten du nola agertu ziran emen Haritschelhar, Lafitte eta Larzabal euskaltzaiñak Maiatzaren 29-an, illeroko batzarrea genduelak an. Haritschelhar’ek, urrengoan etortzerik etzuelakoan, bare iritzia azaldu zuen araudi eraberriturako aurkeztua dagoen 14-garren artikuluaen kontra: euskaltzain bein izendatu danak, euskaltzain bear du iraun bizi daiño, gerta ala gerta. Lojendio’k ere ezteritza ongi agertzen eztenari ordezkoa autatzeari, ordezko ori euskaltzain osoa bazainbatekoa bailitzake.

Bilbao’n, Indautxu’ko Aita Jesuiten Ikastetxea, urtero bezala, egin diran aurren euskal azterketez mintzatu da Irigoyen.

Berriz ere, Berriotoxoa Anaiak esku-artean dituen lanen berri adierazten du. Besteaz gainera, aur euskaldunentzako (6-7 urtetakoentzako) idaz-saioak prestatzen ari da. Inprimatzeko eta zabaltzeko artu bearko diran bideak aipatu dira, Euskaltzaindiak ahal dezakean neurrian lagunduko diolakoan.

Oi diran otoitzez asi eta bukatu da batzarrea.